

榭  
邱  
詩  
上

七



椒丘詩叙

釋氏云毘盧法身中一華



一世

界予嘗詳觀萬法一事一字中

皆有一天地存焉詩其一也六

義中法界廓然凡星緯岳瀆仙

釋將相之巨麗下至夭喬飛鳴



無不備具隨人力之所至而分  
現焉乃蠡測之士偶涉一逕遂  
自謂翔古人所未有而欲盡廢  
諸家之所各得不知我所矜持  
者正皆古人之所涉焉而化不  
欲以崑家自域者也其步趨前

矩者則又奉一先生爲不祧之  
祖而欲盡抑冠裳奉其牛耳不  
知古人雖衰然大家就其才分  
之所饒各有所至則亦各有所  
偏自不能兼所不逮以爲美而  
非謂投足之外餘遂無地可翺



翔也故毀則方隅譽亦姝媛求  
能自廓其才路而仍兼劑乎衆  
有以備乎巨麗之觀者吾見亦  
鮮矣予不能詩而雅喜野鶴之  
詩野鶴英分踔厲學涉淵通能  
兼古人之所長而去其累卓然

自名於時趨之表良爲未易材  
也夫聲律之道不過情文二者  
而已而偏則各病以姝子閨閣  
之致或達官呵殿之容遂云可  
高步騷壇軒翥菽圃其然豈其  
然乎今野鶴操觚應節獨能聲



與情屬情與文緯所云自廓其  
才路而仍兼劑乎衆有以全乎  
巨麗之觀者非歟獨念士人負  
非常之才故當出牧方州入登  
禁闈以功施見于天下而野鶴  
才具如此乃僅僅以咏猶之音

侈其鞶悅惜矣卽以詩等差古  
今又未能與賦清平連昌寒食  
東風諸君子上結明主之知而  
僅僅于椒丘齋中攢眉叉手高  
揖桑民懌歐楨伯而以苜蓿抗  
衡海內其邑邑爲何如耶然人

生虎鼠無常何可以目前遽定  
今上方雅意文學下明詔厲學官  
將求天下才學淵通之士而不  
次庸之今野鶴文詞滿天下見  
知當代必無浩然飛卿之嫌矣  
且野鶴服古多大畧劇切時機

粲如指掌嚴樂諸子去人何必  
有間也野鶴固以詞人終乎哉  
順治丙申仲春東蒙高珩書  
於燕市



容城孫鍾元徵君書序

立兒來此五月每自道先生誘掖至意隘而擴之使宏迂而引之使達此子卽孤癖不能領受弟感佩不啻身承至於詩之道時賢人人推重弟謂非忠孝人

不能作詩人淵明子美是何等  
識趣人謂二公深於學故深於  
詩子貢論學而知詩子夏論詩  
而知學詩與學正不作岐觀耳  
薛宗伯十年受知邇始謀面一  
見便津津丁先生意亦不專在

詩也黃石齋合春秋易詩三經  
爲一詩之道無微不入無顯不  
包寧直三經自羲文周孔以來  
有字之書無字之理同條共貫  
其有不貫者是異端也弟絕不  
知詩之人而與先生言此爲先



生已得詩之趣矣賡歌之餘或  
不忘七十三歲老病夫於千里  
之外也臨楮北望神已先馳  
順治丙申仲春寓蘇門朽弟孫

竒逢頓首奏記

椒丘詩自序

是集也曷取乎椒丘而  
名之予誦楚詞雜申椒  
與茵桂兮豈惟紉夫蕙  
茝步予馬於蘭皋兮馳

椒丘且焉止息又曰蘭  
芷變而不芳兮荃蕙化  
而爲茅覽椒蘭其若茲  
兮又况揭車與江離何  
爲乎楚詞言椒而未已

也夫椒之爲氣也冽辛  
嚴芳潔辟惡而通神明  
主五味之和而性獨熱  
春華夏實蠹虫避之亦  
猶士之有守芳馨所宅



桃暈之所不敢褻也亢  
來容城職在俎豆惟椒  
蘭是司顧生平質性亦  
近薑桂乃所居齋東與  
椒山先生之祠比鄰日

惟羨墻二疏讀王身  
忠愍碑樛松凜然霜雪  
在望昔先生以直諫謫  
狄道尉遷諸城令由是  
內轉而以擊姦終亢諸

人也來息於此其椒丘  
之謂乎其西則元儒劉  
靜修之講席在焉申椒  
茵桂食墜露而飡落英  
將於是乎取故以所著

名椒丘草

順治乙未仲夏東武丁  
耀亢書容容署中





椒丘詩卷一目錄

甲午 計一百五十八篇

甲午元旦家居

懷宋荔裳考功出備秦州

劉子羽將過膠東却寄張石帆石鷺兩甥

次斗翁梅下對酌韻

海凍大魚不出候食魚始北行

栽松海上寄劉斗酌 答丘子廩

赴容城答斗翁贈別

海上漁人言往歲春水魚至有三大魚來停海邊

身長如阜經旬始去予欲見之今歲冰雪海凍  
大魚不至悵然竟北因為大魚行

劉斗酌季履素劉子羽餞於塔山

飲青州房公園懷海客先生贈長公秋水

過朱叙明舊宅

明宗善書國公殉難

鍾敬伯舜豫一士出劇見招

客中清明逢初度

高谷虛通政招飲詠木假山贈冢君木王

翟開子招同趙受介侍御偶集談蜀中事

欲卜居郡城寄青州同志

和趙君孚咏螢

濟南上巳載酒尋孝廉閻古古王令子於禁所

濟上別趙君孚

恭次張方伯泉上招飲原韻

張方伯席上同于賓唐史虎山閣黃山谷題王壽

卿篆碑

碑在陽丘公搜得之

留別趙君孚

齊河道中二首

酬張方伯贈別

次坦公先生泉上留別贈韻新建亭名雪照

寄謝張方伯再次前什

平原縣道中

德州訪羅欽瞻侍御

移兵德州二首



題西湖傳奇曲末

上巳日張方伯招遊酌泉次原韻

羅侍御庭中海棠 保定道中夜宿開元寺

謁楊忠愍祠次壁間韻 先生舊諸城令

謁劉靜修祠次壁上韻 先生義不仕元容城人有文集行世

寄孫鍾元先生次冢君孫君健韻四首

過漢昭烈樓桑村

保定太守胡蒼恒將赴洮岷過容城招飲

同王方岳黃朗生郭文海匡孟起田淑殷晚集宋

園 挽張中柱閣老

過陸舫舊居別主人曹子顧太史二首

夏日薛衛公仲蓐叔芬季實載酒招集崇教寺靜

觀上人方丈二首

魏石生都諫招同楊猶龍學士紀伯紫晚集

恭陪部堂祝少司農梁少宗伯散賑

往于宋荔裳聞祝司農好士今得遇於下吏誌感

再贈胡兵憲赴岷峨二首

同保屬諸公餞別胡兵憲載酒夜渡易水宿遙村

寺三首 贈靳石渠邑侯

甲午孟夏上艾長人春坊

易州隨賑陪上臺宴集三首 荆軻故里

易州張孟鐸送易酒

甲午春畿南大饑捐俸紀事 并序

容之寒士有傭工荷鋤代賃織紝或牛僧販豎日

以自給者既捐俸量賑各賦詩悲之

夏日雨後卽事二首 寄懷永寧張玉調侍郎

過師養初柳影圍晚集 雨後保陽道中

醉贈李兼山蠡宰

韓將軍席上戲贈保屬諸宰

夜宿陳善百客館 過保定寄寓王別駕署中

由保定南門泛舟至新安夜訪黃宰素侯

自新安舟至五方口 容城道中卽事

時維立秋百感斯集爰作秋興取次杜韻聊以自

娛七首 答次胡梅溪見贈移居避暑

靜修祠松下獨坐終日待友人不至

贈韓禹甸保陽都闈 夢泰山行



毗坐宋家亭子聞祝梁兩侍郎有薦疏  
胡信山處士南遊歸道寓綠林

古井 俛仰

上耿撫臺 送王逸菴大行奉使琉球

張方伯自濟南赴浙江左轄為詩寄別

中元日將入都別椒社諸子

劉太宰齋中盆蘭

同劉西水大行夜飲任司農宅

都門送曹峩雪先生歸松江

曹峩雪先生携詩枉駕時子顧館選編修

張方伯刻予詩於趵泉石上 時自雪樓修成

劉秋士新授揚州司李偶同寺寓戲贈

黃心甫延陵高士徵詩於都前扶輪詩集校選未

遍知者因與言詩

都門再和黃心甫秋興兼呈當道諸公

上吳駿公先生時掩關都門候補

曹子顧太史招同江南黃心甫彭雲谷沈韓倬劉

逸民夜集陸舫舊居

甲午病不入闈謝楊猶龍學士 無求

九日壽高中堂封公 贈韓聖秋內翰

懷王偉樹東粵左藩 時陷賊後超遷

代贈浙中學憲 觀奕

壽佟少宰 乙未順天鄉試入簾執事作罷釣

漁諸作 收掌雜著六首

昌平宰郭季狝述明代十二陵有感

陸鶴田郭季狝史庸奄過飲署中時中秋前二日

李錦秋少府饋酒脯 中秋同諸公宴集貢院

中秋陸馬三更後月始明移席中庭

釣鰲吟主陸鶴田 次曹秋岳寄龔孝升五韻

賦得天馬老能行 故劍 敝硯

月夜同陳西樊馮清源陸鶴田登明遠樓

魏昭華侍郎以抗疏遷遼東二首

李錦秋王貞復再邀登明遠樓

貢院孫京兆送白蠟

再贈李錦秋少府時以悞失左遷

出闈別同事諸公是歲場號多悞二首



收掌事竣計朱墨一萬七千餘摠歸入簾有慚初志  
榜後落卷捆載付市折價傷之

文信井

在貢院東文場金麗二號

賀高少宰雍師壽日冢君得捷

送毘陵黃心甫徵詩北歸

九月出都別諸公有感

祝浙方伯張坦公先生兼懷西湖

出闈後曹子頌太史招飲陸舫

留別劉太宰四首

冬初易州謝許兵憲薦

同靳邑侯劉範修飲南城樓

定興道中九月望紫荆閣上雪

金方籀陳藹公共集陳善百寓齋二首

寓善百齋中賦贈二律

書懷

雪中宿龍角村僧舍

曲陽宰葛福綏雪中枉駕

冬日晚行過孫徵君故廬贈冢公君建

宿高里

高漸離家

曉行候督學程內院

許兵憲招同張恣公盧濟如陳藹公夜集出古鼎

名畫 久客古廟戲答索酒諸客二首

冬至三首

易州王別駕招陪鄒司理風大不能赴作詩謝

同張志公登易州城眺荆軻山

陳善百過易州張志公寓次韵

南城共眺再東志公 候陳藹公不至

招客 邊愁

謝劉璽楚明府見招 季冬二日上祝司農

呈少宰梁玉立先生 暮冬上劉太憲

答孫鍾元徵君時寓蘇門山

薛行塢夫子晉少宗伯

集陵張伯器談養生理

謝張孟鐸刺史歲終送易酒十餅官炭千斤

志公百善過飲嘗鄉中海錯二首

荅丘子廩寄過椽谷山居原韵

易州逢趙文成何調之顏駐影舊同訓遼壘皆分

鐸上谷

臘盡懷去年海上劉斗酌賞梅諸友



同友人載酒登易州城樓

蓮露釀成新安水泛多蓮採露作麪雜以花鬚色  
味皆白以蓮露名

椒丘詩卷一目錄終

椒丘詩卷一 甲午

鉅鹿楊思聖猶龍

兩先生鑒定

淄川高 珩念東

東海丁耀亢埜鶴甫著

甲午元旦家居

歲暮樓遲返故廬。移家山海總蘧蔭。桃符門冷人歸晚。  
爆竹聲稀兵過餘。載酒追尋無舊友。閉門高臥有殘書。  
獨憐遊子長征慣。坐對辛盤嘆索居。  
風雪飄搖故國非。白頭羞著芟荷衣。春來花鳥愁無賴。

老去詩篇靜有機。卜築久。拚山鬼。誚徙家常苦。老親違。  
西園喬木讀書處。回首紅顏付落暉。

懷宋荔裳考功出備秦州

山公方啓事。秣馬復秦封。才大天如妬。名高衆不容。  
蠶叢經棧險。鳥道出雲平。同谷多幽勝。詩題幾處峰。  
相別未經月。長安逐客多。朝評空月旦。官定尚風波。  
不夜臨關塞。隨雲渡渭河。杜陵多舊蹟。詞賦慰蹉跎。  
文采何窮達。名場百變更。鼠牙疑白壁。鴿翼累蒼庚。  
陵谷生人面。陰陽幻物情。古來騷怨客。偏逐塞垣行。

雨雪連西極。秦關落日低。雲深無雁影。風急有猿啼。  
夢憶同盃酒。情深解珮觿。故人天際遠。愁緒並萋迷。

劉子羽將過膠東却寄張石帆石鷺兩甥

春風未破石門雪。驢背遙尋膠水津。豈有巨魚通絕壑。  
誰憐孤鶴喚高旻。杜陵憂世詩偏苦。靖節悲時醉不真。  
東海二甥君好友。涓陽爲託報情親。

次斗翁梅下對酌韻

草堂殘雪酒澆春。堦下寒梅賦洛神。年擬松篁同古色。  
人隨樵牧各天真。風塵荏苒羞漁父。南北流移號雁臣。



元直歸來尋舊約鹿門還結德公隣

海凍大魚不出候食魚始北行

六年京邸食無魚○夢憶尊鱸返舊廬○積雪經春封○蟬蚌○

大風終日掃○鷄鷓止○憐漁父閒○相吊更惜鷗群迴自如○

我欲投詩檄○滄海老龍速使寄丹書○

栽松海上寄劉斗酌

栽松本為投林計○種黍原無出仕心○巢就尚容遼鶴訪○

陰成應作水龍吟○十年雨雪生鱗甲○百尺風濤自古○

但使草堂歸杜老○海邊求仲好相尋○

答丘子廩

舊遊回首各風颺○分署談經歲月遙○老馬總歸遼首○

明妃空羨漢雲翹○應憐劍術心難冷○漸覺文場氣不驕○

前路鶯花君自健○吾生歸計已漁樵○

赴容城答斗翁贈別

春風不掃庾公塵○雪湧千山促去輪○薄宦鄭虔羞作客○

閑居潘岳苦違親○園開水竹歸來志○夢隔蒹葭別後身○

相憶加餐白社客○過門莫惜寄詩頻○

海上漁人言往歲○春水魚至有三大魚來停海邊○

身長如阜經旬始去予欲見之今歲冰雪海凍大魚不至悵然竟北因爲大魚行

巨鰲首上戴三山春逐漁舟往復還海叟初疑出丘阜尾長十里橫潺湲噴沙鼓浪時露脊蔽日摩空半天黑舟子乘風不敢下鳴鈺斂筏泊岸集潑刺一聲天眼開倒吸海水成風雷小魚百萬截頰入噴薄千頃風烟迴任公把釣久相望冰雪漫天迷所向天傾無柱砥狂瀾獨立春潮自惆悵

劉斗酌季履素劉子羽餞於塔山

海叟投竿去東鄰惜釣磯一尊臨野寺千里別柴扉魚鳥情相待山林志不違春風方浩蕩空念鱖魚肥

飲青州房公園懷海客先生贈長公秋水

竹外春城俯短墻石屏松磴薜蘿荒已無下榻留孺子獨有高雲對碎疆松老尚存龍變化藤深惟見鳥正翔到門不欲題凡去臥石何年識醉狂

過朱叙明舊宅 明宗善書國亡殉難

王孫門改失朱扉猶有孤松偃落暉載橐何人知巧遜吹箎無路出危機石臺花老餘殘墨月榻苔寒印舞衣



是我少年遊賞地主人應逐夢中歸

鍾伯敬舜豫一士出劇見招

岐路相逢與未聞滿庭花氣瑞香殘每於曲細歌能度  
偏覺愁空酒易乾海內浮沉人面老天涯去住客情難  
不辭二仲頻來往結社東林待歲寒

客中清明逢初度

久客嗟遲暮勞生嘆物華身名殘夢裡兒女各天涯艸  
綠王孫道花明處士家高堂應繫想春酒負流霞  
百歲行過半茲辰感倍生隙駒空屈指老馬未辭程花

柳春常在風濤夢不驚虛遊知命理濁酒若爲傾

高谷虛通政招飲詠木假山贈冢君木王

散木無雕飾離奇合自然不隨槎泛海疑有竅通天  
地烟雲起蟠根洞壑穿棟梁摧已盡方識大椿年

翟開子招同趙受介侍御偶集談蜀中事

雲門春已半風雨滯行車投轄人如待掀髯興不孤宦  
情驚蜀道客路感齊竽自愧粉榆鷄棲棲靡定趨

欲卜居郡城寄青州同志

亂後移風土頻遷無定居故山同駭鹿涸水嘆枯魚世

變交遊薄城荒耆舊疎茲鄉餘朴厚肯借一蘧廬

和趙君孚咏螢

時序應潛晦非關不自量可憐長夜裏小草吐孤陽避  
影疑團扇分光到隱囊飛蛾投火盡猶羨爾飄揚  
亦識微明弱難爭衆晦功逢陰成燭火化腐感天工細  
雨光難斷流星照不窮有情堪伴客耿耿夜行中

濟南上巳載酒尋孝廉閻古古王令子於禁所

二士談經處鍵門春草深琴聲無殺韵鳥語有疑音載  
酒還修禊連牀卽入林相逢堪一咲誰解脫驂心

千里難期約南冠亦有緣庸人無此遇屯運有同賢貫  
索疑星聚佳辰歎客遷去歲上巳典古古飲報國寺莫須矜李杜卷  
舌老餘年

濟上別趙君孚

燕客移家久齊門客路疑飯牛常在野種黍竟違時酒  
盡鄰誰繼詩孤世不知臨岐空悵戀去住有同悲

恭次張方伯泉上招飲原韻

囊裏松花餽不無年來避地近方壺菖蒲九節根難老  
若木三珠葉未枯雲接太行分岱岳水從王屋到明湖



抱琴欲別成連去天海茫茫月影孤

張方伯席上同于賓唐史虎山閱黃山谷題王壽

卿篆碑 碑在陽丘公搜得之

典冊經塵沒行藏亦有緣物因人始出名隔代方傳昔  
蘇生文采搜尋損俸錢中郎多鑿拔焦尾各冷然  
壽卿書不載响嘯法傳唐薄俗輕文藻名碑竟秘藏才  
人來岳牧雅集在河梁一墨稱三絕山川亦吐光

留別趙君孚

趙子風塵外蹉跎困旅身白驢衝洛雪青柳閱齊春口

真怯向人君看拾穗者行樂號天民

道中

灤水春風清前山各路長官柴平漫柳野屋自生桑歲  
傍開魚鱖官貧想麥黃驅車十里去燕樹遠蒼蒼  
春草隨行役桃花過雨殘馬疲憊遠道裘敝怯餘寒橋  
斷河聲急城荒澗影乾年年携兒女捉抱索盤餐

酬張方伯贈別

事去輕羅雅何人古道發名山搜鳥迹羣水赴龍門白  
三酬高士清言飲上尊臨邛多禮遇仰止愧崑崙

袁坦公先生泉上留別贈韵新建亭名雪照

登臨能使客懷消。共對離尊怯路迢。樓外千山新照雪。泉邊羣壑欲通潮。曾經鸞馭南州近。再過龍門北斗遙。慚愧驅車就微祿。不堪回首鵲華橋。

寄謝張方伯再和前什

青袍白首興全消。逆旅真堪賦楚騷。悔不讀書嗟歲暮。苦緣微祿去親遙。東風上谷啼春鳥。細雨滄沱散暮潮。海內但存黃石約。天涯回首有圯橋。

平原縣道中

野日粲平沙。空原剩幾家。巢傾時見燕。水落尚浮槎。古渡河身反。新堤隴樹斜。無人知蹙者。毛薛散天涯。

德州訪羅欽瞻侍御

一別卽周歲。京華志各違。酒香酬客渴。飢飽恤兒饑。久契輕排闥。長征羨拂衣。海棠何爛熳。千里見春暉。

移兵德州

瀛海人將盡。移兵駐德門。連營無鳥過。百里見塵昏。車力勞三郡。田封徙萬屯。莫愁禾黍失。

明主有恩綸。時方發帑賑飢。



經行如雁陣萬幕競臨河  
雛女牽青兕羗兒掣白駝  
插旗收土著牧馬散平坡  
正好圖王會民生莫浪嗟

題西湖扇傳奇曲末

天上雙星不易投  
飛花常恨水東流  
明妃不返仍青塚  
蔡琰重歸已白頭  
豈有玄珠還合浦  
空傳彩鳳下秦樓  
排場但作真實相  
玉杵年年伴酒籌

上巳日張方伯招遊趵泉次原韵

春遊因人景物殊  
偶逢修禊聚星徒  
三花浪感春常在  
一夜珠明海不枯  
氣接狀流通造化  
聲騰雷雨盪虛無

知君負貯蘓門水  
雪照滄溟引興孤

羅侍御庭中海棠

庭樹花遲客春風未許吹  
芳林香暗度家醞醉相宜  
紅暈天桃妬柔條宿鳥窺  
興迷忘去處忽憶韋公祠

保定道中夜宿開元寺

風吹沙急撲征衣  
羸馬孤行對落暉  
遠愛疎林隨雁遠  
晚投埜寺伴僧歸  
不辭歲暮甘萍梗  
漸苦官貧少蕨薇  
夜半荒鷄鄉夢醒  
一聲清磬發天機

謁楊忠愍祠次壁間韻

先生舊諸城令

東武西城舊有祠，還於梓里拜光儀。連章不惜剛如鷲，就鼎誰甘去若飴。此日丹心留俎豆，千秋浩氣見鬚眉。中原馬市終淪沒，獨立夕陽看二碑。

謁劉靜修祠次壁上韵

先生義不仕元容城人有文集行世

古祠高栢鳥嚶嚶，丁亥遺文見典型。軒冕何能榮俎豆，躬行原自足箴箴。雲過絕壁分天影，松挾寒濤帶雪聲。柔許何人難自遠，濁流不得濯清纓。

寄孫鍾元先生次冢君孫君律韵

窮無力起昏蒙，悔別青山憶桂叢。鴻雁不辭燕塞雪，

鷓鴣常避海門風。江河日暮憐羈旅，草木春深愧化工。

獨羨垂竿人自遠，嘯臺高枕月明中。

時鍾元隱燕門張大司馬墅

挾來山色自東蒙，千里驅車問野叢。計口移家愁惡歲，從官失路咲春風。羊腸漸覺驂驢拙，懸腹安知絡緯工。白首監儒食脫粟，蕭蕭寒雨古祠中。

拂笠風塵面欲蒙，難將身世闢蚕叢。揮戈無復魯陽日，破浪誰為宗慤風。萬事鞭長途漸短，一生袖拙舞難工。誰憐薄宦投荒徼，紫塞黃沙醉夢中。

行藏有志竟蒙蒙，豈不懷歸負菊叢。偶逐鷄棲遊汗漫，



林丘詩 卷一  
誰○晉○鶴○馭○下○天○風○年○荒○酒○薄○愁○難○破○路○盡○詩○窮○句○不○工○  
便○欲○東○尋○浮○海○客○雲○濤○烟○渚○森○茫○中○

過漢昭烈樓桑村

山○桃○河○流○接○范○陽○道○旁○遙○指○古○樓○桑○三○分○已○兆○中○原○時○  
一○綫○猶○晉○火○德○光○崛起○風○雲○多○俊○傑○番○成○謀○略○失○荆○襄○  
堪○憐○白○帝○英○雄○盡○沙○塞○蕭○蕭○落○日○黃○

保定太守胡蒼恒將赴洮岷過容城招飲

使○君○旌○節○下○西○京○渭○水○遙○分○易○水○清○入○幕○偶○然○來○魯○士○  
離○歌○此○夜○變○秦○聲○一○尊○月○落○山○城○曉○千○里○河○流○塞○樹○平○

無奈浣花人到晚天涯猶及續齊盟

同王方岳黃朗生郭文海匡孟起田淑殷晚集宋

園

地○僻○成○良○聚○招○尋○卽○入○林○菘○畦○聞○雨○氣○苔○壁○過○雲○陰○離○  
索○驚○年○暮○悲○歌○感○夜○深○舊○遊○如○旅○夢○江○海○各○升○沉○

挽張中柱閣老

澤○山○舊○社○憶○同○群○鸞○鶴○先○移○北○斗○文○君○已○黑○頭○爲○宰○相○  
我○猶○白○髮○滯○叅○軍○槩○隨○鶴○化○音○難○再○劍○作○龍○騰○氣○不○分○  
窮○達○死○生○同○契○濶○從○來○人○事○等○浮○雲○

過陸舫舊居別主人曹子顧太史

六年鴻雪憶京游。陸舫真如不繫舟。  
愧我孤蓬遺絕壑。借君擊楫渡中流。  
草堂舊念烏皮几。玉署新賡黃鶴樓。  
風雨東墻存墨迹。林宗掃榻爲人留。  
到來松影隱禪扉。舊種花畦葉不肥。  
藜火已懸新史燦。燕巢應識故人歸。  
枯槐蟻過留傳舍。明月魚寒惜釣磯。  
堦下露葵高比屋。龍門車馬自光輝。

夏日薛衛公仲孺叔芬季實載酒招集崇教寺靜  
觀上人方丈

古殿高雲敞。晴槐密影開。  
綠尊隨地設。黃鳥爲人來。  
客

戀。贊公榻。官空杜甫杯。  
還聞歌白苧。爛醉不須回。

野宿憑僧舍。招尋省杖錢。  
官貧求作客。人老羨歸禪。  
筓。鶻馴相近。盆榴照欲燃。  
河東多鳳采。起舞影翩翩。

魏石生都憲招同楊猶龍學士紀伯紫晚集

掖垣封秘諫。書多海內爭。  
傳魏掌科筆。有風霜。回砥柱。  
胸蟠星斗動。天河應憐劇。  
孟頫看劍似惜林宗許。共艤。  
自嘆夷門人欲老。漫勞車馬市中過。

恭陪部堂祝少司農梁少宗伯散賑



星使雙輅引秩宗。水衡親賜大司農。窮簷計口遙牽子。  
鮐背支頤遠杖筇。尚有枯魚沾雨化。豈分寒卉隔春穠。  
最憐巖下多饒色。縱有明王夢不逢。

往于宋荔裳聞祝司農好士今得遇於下吏誌感  
風塵誰復念途窮。此日遭逢有上公。劍本沉埋憑氣壯。  
馬因剪拂覺群空。山林骨重官終拙。詞賦名輕步未工。  
慚媿長安逢賀監。後車誰擬載楊雄。

再贈胡兵憲赴岷峨

洮河西望玉門關。羌笛能消壯士顏。宛馬何時通禹貢。

鬪裘有路度秦山。黃河遠塞烽烟靜。白日孤城畫角閑。  
聞道酒泉還內召。封侯莫待髮毛斑。  
羨君車馬去駸駸。渭樹秦雲驛路深。天外三峰開隴棧。  
河流幾曲度華陰。家藏筠管通番落。郡釀葡萄足醉吟。  
莫道邈方供給少。洮岷山水盡黃金。

寺  
同保屬諸公餞別胡兵憲載酒夜渡易水宿遙村

細雨涼生邊塞秋。蕭蕭班馬渡寒流。雲開山簇雄關出。  
野濶沙明故壘秋。今古每憐人易散。英雄常恨事難酬。

旗亭不隔燕秦路。負弩難從華岳遊。  
日落山橫晚照開。別君繫馬過燕臺。黃金易盡驂騑老。  
白髮難消壯士哀。別館誰能收樂毅。後車空欲載鄒枚。  
相逢意氣聊從飲。半夜衝河渡酒來。  
河梁分手唱驪歌。此日天涯去任何。聚散總悲知己少。  
行藏通計別離多。宦途冷暖嗟人事。客路年光惜逝波。  
珍重中原還雨雪。西音好寄莫蹉跎。

贈靳石渠邑侯

羨君官署似山居。我亦空齋讀異書。椒社新從忠愍後。

松祠同拜靜修餘。遼陽尚有人知鶴。易水豈無客贈魚。  
一片猪肝酬不盡。肯教安邑累清虛。

甲午孟夏上艾長人春坊

夏雲青不盡。天祿秘書多。北闕分虹氣。西山駐紫邏。閱  
躬存雅量。壽國得中和。賀監逢知己。應酬燕市歌。

易州隨賑陪上臺宴集

保陽三輔首。關塞遶邊城。山川相盤挈。控扼接北平。當  
時甘棠澤。遺愛餘神明。古今相代換。南北多紛爭。國衰  
樂毅去。事迫荆卿行。白衣渡易水。日暮空歌聲。



微官司俎豆有志喜遨遊。寵膺上公召枯草如新抽。邑宰資輿馬百里未云修。猪肝食不易旨酒足所求。芳園多嘉樹崇構倚清流。尚有黃金臺不復見驂騑追隨。怨偃僂知有燕昭不。皇恩方浩蕩群公各勤劬。哀軫此遺黎待哺推向隅。堵墻觀渙汗連衢來號呼。一飽誠爲難億萬遂捐輸。天澤難普被物命分榮枯。安知群力竭不能酬一夫涓涖効。微末日夜空鳧趨。時捐俸養士四百人給三十升

荆軻故里

非人事誰一劍術疎。枉心非怯衝冠髮不枯。招魂來易水春艸滿平蕪。國弱乏長策獨憑烈士身。雄圖酬一劍死氣動三秦。別頸伶仃將捐生謝主人。田光終刺客謀畫本無倫。

謝張孟鐸易州送酒

山邑民多瘦泉香富酒家。願投良醞暑不返廣文衙。食官無賴分肝客有涯。漫勞多負荷百里未云賒。何法融關鬲窮愁病鬱陶。肯將甘露液分潤到枯苗。醉憶中山釀謀潛栗里瓢。酒錢貧自給運甓莫辭遙。



甲午春畿南大饑捐俸紀事 并序

順治甲午發內帑遣重臣巡行散賑許各官量助  
元教諭容城謹捐歲俸百金以贍士之赤貧者五  
十二家量給谷麥盡俸而止奉部堂祝梁二侍郎  
特薦於朝雖小惠無補少伸涓志為詩自紀

天地雖云大寒暑多怨容堯舜雖至仁  
熒獨難普施春風固浩蕩厄弱誰能持  
南畿失恒業三載沉淪滴田里歸王屯  
少壯遠流離容城彈丸地白晝絕烟炊  
窮巷無行人寒士空肝脾我來方百日  
首藉乏長資破屋僅三

楹蒿藜相蔽虧問經無一士持鉢時有之  
門役三四人縮頸如鷺鷥老者病不起  
壯者來長辭乃賣所乘馬借質衣與卮  
日給一饘粥真延麥黃時皇恩推雨露  
內帑出聖慈春官與司農親給靡有遺  
官卑難自達觸目心酸悲出位恐獲戾  
窮士我所司願捐歲升斗少濟天澤  
施精衛思啣石功微心則痴榮名安可冀  
聊以慊吾私容之寒士有傭工荷鋤代  
賃織絰或牛僮販豎日以自給者既捐  
俸量賑各賦詩悲之

荷鋤



荷鋤休作帶經看。日得傭錢備一餐。多少侏儒飽欲死。  
古來堪溺是儒冠。

賃紡

七尺鬚眉効女紅。依人杼軸得酬功。不知雲漢天孫錦。  
別有絲綸可濟窮。

牛僧

牛口名賢識者稀。還從牛後得周飢。歸來坐對牛衣泣。  
日見牛肥不自肥。

提秤

古之秉國號持衡。汝有何權稱物情。我亦才堪天下字。  
何人能解薦陳平。

販酒

相如夫婦自當壚。日日藏名隱市壺。不見高陽來貫酒。  
荒年能使酒人無。

負薪

重負輕酬淚不乾。上肩容易卸肩難。縱然做得會稽守。  
已被前妻冷眼看。

灌園

井李分螬咽復吞何如賃汲借囊殮年來仲子無歸處  
安得於陵一畝園

別土

杜陵漫賦無家別此地諸生半外行轉愛異鄉人不識  
逢人莫說是諸生

夏日雨後卽事

空齋孤樹一蟬鳴夏日陰陰草易生  
睥睨似盤雷氣隱  
蟬蟻遙射雨光明荒城罷市愁賒米  
熱釜停炊號戛羹  
久客漸知鄉思苦不如高枕夢魂清

地幽心遠似浮槎積雪空厨見落花  
千里故山隨鹿夢  
十年蹤跡半匏瓜未聞斗米能工  
宦自嘆孤蓬久失家  
老去轉憂謀食累微官真可賦彭衙

寄懷永寧張玉調侍郎

難忘載酒過南鄰古寺看松問野人  
別後詩篇猶記否  
年來醉興許誰真閑繙石帖瑤華館  
夢憶京塵陸舫春  
聞道鳳山千畝竹何時嶰谷起蒲輪

過師養初柳影園晚集

古○亦○十○圍○蔭○一○圍○婆○娑○相○對○欲○忘○言○  
浮○橋○水○溢○侵○禾○黍○



小圃雲香蔭蕙蓀。白鷺于人馴不去。清尊對月靜無喧。  
晚涼過雨看河漢。夜氣波光浸竹痕。

雨後保陽道中

隔浦斜暉映短蒲。晚霞遠照影模糊。山開薊北重重嶂。  
雨過畿南處處湖。逐浪遊魚隨岸上。空林餓鶴傍人呼。  
葛洪山近白雲遠。愧向風塵老櫟樗。

醉贈李兼山蠡宰

窮途覓酒興仍長。故態還驚貴客場。自信微官輕易擲。  
應愁家累苦難忘。客鄰安邑肝當乞。人賦彭衙米未償。

二十諸侯應大笑。從來未見廣文狂。

韓將軍席上戲贈保屬諸宰

落○鳧○才○名○愧○浪○傳○却○從○首○藉○仰○高○賢○因○周○貧○士○全○捐○俸○  
欲○向○明○公○橫○索○錢○隔○壁○分○燈○誰○續○續○依○人○熱○釜○少○炊○烟○  
應○知○老○大○渾○無○賴○不○及○長○安○酒○肆○眠○  
遼○陽○無○用○嘆○知○稀○久○被○人○呼○丁○令○威○泛○水○巨○瓠○根○易○老○  
出○山○小○草○葉○難○肥○詩○囊○紀○日○添○新○句○酒○債○經○春○減○舊○衣○  
仍○有○壯○懷○消○不○盡○南○山○相○對○咏○朝○饑○

夜宿陳善百客館

一○群○貧○病○失○良○圖○夜○雨○瀟○瀟○對○酒○壚○瘦○面○相○看○惟○管○蒯  
空○囊○何○計○贈○珊○瑚○應○知○麥○飯○能○酬○客○更○典○鷄○裘○欲○覓○酤  
幽○憤○莫○教○搖○落○盡○牀○頭○尚○有○寶○刀○孤

過保定寄寓王別駕署中

逍○遙○不○解○是○何○官○屬○吏○能○令○禮○數○寬○才○薄○每○勞○勤○顧○閑  
客○貧○堪○許○共○盤○餐○愁○聽○夜○雨○斜○聯○榻○醉○看○晴○雲○倒○着○冠  
分○得○使○君○冰○玉○冷○一○堂○秋○水○浸○琅○玕  
沿○門○傳○食○累○群○公○避○熱○能○忘○拜○下○風○家○計○頓○拋○天○地○外  
宦○情○原○在○有○無○中○孤○雲○到○處○松○三○逕○明○月○懷○人○桂○一○叢

何○用○稻○梁○吟○瘦○鶴○數○聲○高○唳○過○崆○峒

由保定南門泛舟至新安夜訪黃宰素侯

郭○南○舊○河○路○山○水○通○津○源○小○小○集○漁○艇○貿○易○代○車○轅○如  
何○成○積○潦○一○望○沒○平○原○泚○泚○浸○禾○黍○蕩○漾○浮○村○垣○荒○茨  
無○居○人○古○柳○浸○柴○門○樹○杪○見○繫○舟○鷗○鷺○時○飛○翻○東○南○火  
雲○起○隱○隱○雷○聲○殷○促○棹○百○里○外○白○波○沒○城○根○曾○無○棲○宿  
處○隔○垣○夜○叩○闥○使○君○來○暫○牧○靜○臥○訟○無○喧○空○庭○集○水○鳥  
芳○草○生○階○樊○鐘○鳴○出○候○客○燈○下○及○寒○溫○匆○匆○問○飢○渴○草  
草○具○壺○殮○相○顧○兩○忘○言○感○遇○安○足○論



自新安舟至五方口

小港僅通舟泥塗盪空景不及乘橈行亦如凡馬騁河  
菱與呀沙頽倒不復整野趣雖汗漫遊人恣所領風動  
有芰荷暗香不可屏  
水淀環四澤淡蕩搖烟雨微風起洪瀾膏腴成淵渚天  
未見樹稍飄緲辨村塢晚霞多絢耀雲物怪莫覩月出  
如丹砂村路迷禾黍仰觀水星光滄浪渺何許

容城道中卽事

日暮荒城鳥雀饑野烟迷處有柴扉不堪水没秋禾盡

漸見人空市米稀村落泥深餘牧馬郭門蓬塞掩斜暉  
天時世路還如此海上尊鱸何日歸

時維立秋百感斯集爰作秋興取次杜韻聊以自  
娛

歲月星徂雁過林涼生秋氣晚森森火雲出塞將收暑  
積晦成霖未斷陰匏葉繫人千里夢鷄棲留客五更心  
年年汗漫忘歸計紫塞清秋送夜砧  
平成䟽鑿禹神功積石龍門注導中九鼎自歸蒼玉珮  
六鰲常拱翠華風雲迷大陸沉波黑日射陽侯過峽紅



一望瀰天成巨浸。可能飄泊効漁翁。  
經旬覓飲竹冠斜。古塞驚秋老鬢華。無路入山羞葛屨。  
有人浮海候騫槎。長安葉落三都賦。遼戍人悲午夜笳。  
誰借中山醲醑酒。往尋秦谷武陵花。  
夕陽山氣亂清暉。鳥沒孤烟去路微。瘦馬不堪終日卧。  
饑鷹何事待人飛。著書地少初難遂。種藥心孤願易違。  
欲賦猗蘭羞自佩。不教叢菊羨春肥。  
長沙秋色隔君山。千里龍蛇出沒閒。黃鶴斷磯連楚壘。  
蒼梧明月度荆關。舳艫遠盡東南力。組練秋摧都護顏。

六月出師援閩粵。太平奏頌仗鷓班。  
津門遙控九江頭。禹貢梯航萬國秋。橫海鯨鯢分水亂。  
重關帟豹動鄉愁。畿南飄屋將浮燕。淮北停橈不起鷗。  
是處雨暘偏未若。上游川甲近秦州。  
絳冠袴褶自逶迤。䟽檄千官奏海陂。月近遼陽千尺雲。  
松盤元殿萬年枝。物情漸使陰陽變。天令終憑朝市移。  
皂帽何曾關氣象。西風霜葉向人垂。  
入山不看爛柯碁。甲子徒生大夢悲。鷄塞龍庭非昨日。  
漁歌樵唱說當時。曾經楚水投簪早。悔別龍仙採藥遲。



寂寞江湖今古恨。空庭秋月足相思。

答次胡梅溪見贈移居避暑

伏火初收爽氣初。庭槐雨過賦閑居。閉門謝客愁沽酒。  
掃地移牀倦著書。高座清言蘭蕙似。滿階秋水鷺鷗如。  
漫勞錦字酬飢渴。苜蓿盤中有太虛。

靜修祠松下獨坐終日待友人不至

獨坐油殘暑。條然靜氣來。曠觀原有得。齊物本無猜。  
雨過蛙聲急。雲行樹影開。天游堪自足。行止亦悠哉。  
蒿長城隅僻。閑行水巷偏。日遲聞語鳥。坐久入荒烟。曬

藥防衰質。看碑憶往賢。無人堪共語。懷抱自冷然。

巷語靜無聲。偶尋道士行。饑鳥啼古樹。流水浸荒城市。

遠炊烟斷堦。閑旅穀生不須懷。二仲獨立免逢迎。

喧寂隨人境。何心嘆索居。茶瓜堪伴客。麥飯久忘魚。多

事交遊薄。平心偃僂除。迢迢知物理。蒙叟自蘧蘧。

劉子風塵外。藏身重仕元。清時仍笑兀。濁世各寒暄。養

晦時能遜。文明道自尊。抱關羞吏隱。何以脫籠樊。

抱膝竟終日。圍烟過樹低。野花纏蔓亞。水鳥上城啼。去

在天休問陰晴理。亦齊無錢尋酒伴。來往自提携。



柳上詩 卷一  
畫臥拋長簞。行吟有籜冠。最憐松下影。似帶雨聲寒。土  
瘠稀遊侶。年荒減夜餐。高人原落落。無用罄交歡。  
何事無幽賞。獨遊意頗真。已知靜者理。貧病豈徇人。適  
性看蝸縮。因時想蠖伸。中原方莽蕩。江海一垂綸。  
五十頭全白。逢人眼未青。一官真廟祝。千里似江萍。學  
步慚公謁。高談駭衆聽。靜中堪自哂。雷雨負伶俜。  
暮蟬忽聒樹。向晚意彌深。久立尋歸杖。多愁咲苦吟。故  
山雲外影。秋雨夜來心。不厭松根憇。蒼茫薄暮陰。  
薄俗畏人慣。狂遊借馬遲。閉門防脫略。高興怯追隨。草

露空庭得。松風午夢知。杜陵悲掃迹。一飯已支離。  
青蘊散木客。絳帙信天翁。漂泊因時慣。疎頑付老慵。掉  
頭瓜蔓側。欹枕豆棚中。鬱鬱誰能久。秋風我欲東。

贈韓禹甸保陽都閫

狼山古塞接燕雲。雄鎮高懸壁上軍。帝用韓侯非爲武。  
人如士雅本能文。當風看劍星辰動。清夜談詩薜荔分。  
欲訪葛洪容載酒。百花嶼近好逢君。

夢泰山行

我所夢兮乃在東海之巨渚。天風搖波石作雨。日觀峰



在虹橋西。仙袂飄飄。風自舉。傍視倒景。列缺之光。東行  
 氛霧烟茫茫。下不見底。今上不見天。獨乘虛氣。相翱翔。  
 雲臺璇闕。高萬丈。中有人。今身衣絳。長頰廣額。光熊熊。  
 神宮環列。開仙仗。青旛羽蓋。紛葳蕤。雷車電鼓。笙鶴隨。  
 俯躬蕪濁骨。已虧。有人扶掖。喜且悲。山鬼侮我。牽我衣。  
 飄忽如電去。若飛。沈寥但見青青色。何日天門啓洞扉。  
 晚坐宋家亭子。聞祝梁兩侍郎有薦疏。  
 寂歷秋花晚。城隅倚杖初。古槐纏野葛。斷岍上河魚。牛  
 口無高士。龍門有薦書。人生知己貴。不待起窮廬。

工文食不飽。牀有禹餘糧。碧眼珠難覓。白虹劍易藏。魏  
 公。伶曲逆。李白識汾陽。最惜閑園草。秋來襲暗芳。  
 古柏寒天色。荒藤老被牽。無心孤鶴至。有待一鶯遷。雲  
 澁因風起。烟平借水連。誰憐天下士。鑿拔在幽燕。  
 千年一華表。舊識在遼東。雪羽或殊衆。鷄群未許同。不  
 逢龍背叟。誰識橘皮翁。願作丹丘侶。高搏向碧空。  
 龍夔無常性。天泥豈定居。紇干悲餓雀。涸澤嘆枯魚。  
 飯酬金少。千緡買字虛。長鳴因顧盼。雙淚落鹽車。  
 胡信山處士南遊歸道遇綠林

中原知已少。海內此君多。天欲虛吾橐。公無渡此河。珠  
來應按劍。壁去免揮戈。但作山陰棹。空回雪裡過。  
囊惟三百刺。杖有九華圖。脫手堪相贈。何庸當道呼。秋  
風南國遠。落日故園孤。萬事非吾有。歸來免醉酤。

古井

古井人難汲。綆長水易枯。苔寒生蔓草。石塌出陰蘆。深  
淺存繩路。盈虛任轆轤。去鄉猶念唾。泉飲莫須辜。

俛仰

俛仰尋常事。多君愛士前。因人時得意。作態故周旋。樓

下元龍咲壚頭。李白眠。祇憐蛙黽見。未出井中天。

上耿撫臺

瀚海雄風遠。崆峒紫氣纏。夔龍虛左席。召虎冠凌烟。三  
晉旌旄重。二東簡命專。泰山開帶礪。北斗動星躔。帝用  
爲霖雨。謠稱得瑞年。霜威潛墨吏。化雨遍窮簷。曾入韓  
荆坐。仍趨穆醴筵。彤弓將錫履。綸閣許承旃。草木留恩  
澤。齊門雨露偏。

送王逸菴大行奉使琉球

落溱川頭望五華。彭湖島下駐仙槎。中原海向東南盡。



分野星從閩粵斜黃熟香中開鳳詔碧螺屏底拜龍髻  
客星萬里長風便虹玉歸來紀白麻

張方伯自濟南赴浙江左轄爲詩寄別

雪樓新建酌泉清勒石爭懸洛下名東海魚龍方起舞  
西湖梅柳欲逢迎十年白筆垂青瑣一片紅霞近赤城  
匏繫自憐隨夢遠吳山有約隨江聲

中元日將入都別椒社諸子

小散亦云別官堂秋草深一尊因費得三徑許相尋無  
夢名心冷常貧酒力沉杏壇歌伐木虎兕莫長吟

劉太宰齋中盆蘭

瞥如幽谷靜香迴畫室氤氳去復來一座嫣然稱國瑞  
群芳繭爾受天裁應知落處芬難盡莫向穠時花遍開  
分得歲寒晉一珮無言堪付楚騷杯

同劉西水大行夜飲任司農宅

籬下廣文亦被呼司農堂上咲聲麤逡巡入戶酬公禮  
潦倒拋冠號酒徒皂帽下僚煩位置白頭老友免揶揄  
馬○韞○坐○我○終○無○賴○止○可○投○鞭○傍○顧○厨○  
都門送曹我雪先生歸松江

高雲出岫故遲遲返棹秋風愜所思情別非關葦鱸想  
心○遐○不○使○鷺○鷗○知○漆園自著周秦史蘭谷應傳綺皓詩  
海內文章勞夢寐還從梁木紀干支

曹我雪先生携詩在駕時子顧館選編修

賦就東干號地仙漁樵烟水半逃禪豈緣縱酒懷彭澤  
自愛輕吟傲樂天龍臂松風留國史鳳毛蔡火有家傳  
名山螭屐嗟遲暮欲就剡溪雪夜船

張方伯刻予詩於酌泉石上

時白雪樓修成

雪樓重構起泉津遍揚名流墨蹟新海內古亭存杜甫

鏡中片華見于鱗二公皆詠泉上詩搜奇自掃摩堦碣好士能

吹古劍塵湍瀑似為知己賞蓮花十丈湧水輪

劉秋士新授揚州司李偶同寺寓戲贈

冷○瓊○偶○與○熱○官○鄰○車○馬○喧○應○動○客○神○敲○戶○錯○投○頻○反○刺○  
鳴○鷗○悞○入○更○抽○身○烟○花○三○月○催○簫○鼓○首○藉○連○朝○斷○米○薪○  
路○鬼○挪○揄○應○大○咲○廣○陵○騎○鶴○隔○泥○塵○

黃心甫延陵高士徵詩於都前扶輪詩集校選未

遍知者因與言詩

所志在風雅扶輪世未知遠來收海岳先欲淨肝脾薊



北○餘○天○馬○湘○南○少○佛○狸○莫○將○凡○習○調○吹○簫○混○咸○池○  
塵○世○輕○文○采○颺○輪○去○不○歸○天○心○存○律○理○地○氣○入○聲○希○問○  
樂○延○陵○秘○聽○鵲○康○節○微○好○將○十○五○國○高○下○細○占○祈○  
此○道○情○難○恕○盱○衡○析○寸○毫○風○人○窮○造○物○天○眼○洗○皮○毛○棘○  
刺○雕○蟲○小○雲○峰○映○日○高○未○能○追○古○始○纂○組○亦○何○勞○  
歷○代○清○規○變○騷○壇○互○勝○場○學○深○看○點○化○氣○老○驗○蒼○茫○比○  
典○通○靈○幻○機○鋒○在○隱○藏○果○能○人○不○死○李○杜○足○光○芒○  
五○嶽○開○天○地○高○深○足○大○觀○小○山○無○宿○靄○巨○澤○有○迴○瀾○鶴○  
舞○雲○門○曉○龍○吟○海○路○寬○聰○明○原○不○惜○築○砌○尖○巒○吮○

正○變○隨○方○物○佛○仙○一○性○靈○傳○神○原○寫○照○圖○畫○貴○遺○形○雲○  
起○嵐○光○白○潮○來○海○嶼○青○此○中○聲○色○隱○飛○躍○在○丹○經○  
神○超○元○始○上○類○物○受○吾○裁○雅○頌○如○無○理○疇○圖○安○在○哉○笙○  
簧○原○有○竅○蟲○鳥○不○關○才○君○聽○秋○林○葉○吟○風○近○楚○哀○  
紙○上○神○光○動○言○能○與○物○深○大○書○存○典○誥○古○樂○備○文○音○未○  
見○塔○投○袂○相○逢○許○入○林○聊○將○千○載○意○答○贈○九○州○心○  
都○門○再○和○黃○心○甫○秋○興○兼○呈○當○道○諸○公○  
朔○塞○霜○高○透○遠○林○瀟○天○風○雨○夜○蕭○森○橈○車○共○泛○渾○河○水○  
羽○檄○時○飛○大○陸○陰○千○里○蓬○蒿○頰○繫○夢○一○官○匏○瓠○未○安○心○



中原羈旅寒衣少愁聽深閨月下砧

媯皇應煉補天功歲月蜉蝣旅夢中八駿日巡龍在野

百官遙奏馬嘶風秦封地坼雲雷黑楚壘烽連軫翼紅

黃鶴樓中仙笛渺劫灰不見橘皮翁時秦中地震湖南未捷翼軫長沙分

野黃鶴 焚燬矣

不逐黃衫走狹斜平看蕉夢闌年華客星久暗南州榻

河漢空懸北斗槎細雨酒闌嫌擊筑秋林霜老怯聞笳

最憐彭澤仍無米况復東籬菊有花

萬事傷心一幕暉秋山歸夢尚依微長安葉落人猶滿

東武廬成鴈自飛海內漁樵閒地少床頭雨雪故交違

驪駒不遇康莊道瘦骨偏憐苜蓿肥

歸雲別鶴尚思山落鳧堪留酒甕間明月自能翻桂海

蒼苔誰遣破松關心灰白髮遊仙夢面涅紅塵處士顏

十載棲遲無可就文章不入魏元班

籬下騷人已白頭倦從吳越續春秋杜陵路梗存三賦

平子途窮隱四愁詎有風雲隨老驥從來江海傍浮鷗

六鰲無力崑崙折指點齊烟暗九州

青門紫閣自逶迤帝里猶存皇子陂渡塞白雲連海雨



倚天紅杏出墻枝。叱車路險羊腸過。捧檄名高鶴夢移。  
獨有猗蘭人不采。寒香空谷向秋垂。  
閒呼濁酒對殘棋。今古徒勞楚客悲。每羨衛青仍尚主。  
可憐楊惲不知時。急流緩棹行爭速。石火空花開恨遲。  
眠暗讀書無一得。暮蛩踈雨動秋思。

上吳駿公先生時掩關都門候補

羽儀一代仰嶙峋。龍臥滄江夢幾春。欲爲漢唐存逸史。  
須知元魏少傳人。雲高秋盡山難出。鯢化濤枯海易馴。  
不得赤松招大隱。出林黃綺自天民。

山川不隔古人心。兩雪中原夢入林。東海魯連儉父老。  
北牀陳軫越吟深。從無廊下春堪賃。似有溪頭釣可尋。  
欲傍三閭問漁父。西山蒼翠晚雲陰。

曹子顧太史招同江南黃心甫彭雲谷沈韓倬劉逸民夜集陸舫舊居

文章江海盡名流。百尺樓高踞上頭。吳練堪酬天上馬。  
寧歌空飭道傍牛。掉頭我欲尋巢父。勒鼎君應繼鄴侯。  
陸舫再來忘主客。咲看南北一浮鷗。  
甲午病不入闈。謝楊猶龍學士

年來詩思近嗟哦不向殘陽覓魯戈四海拂衣平日觀  
十年濯足傍天河鷲花世路文章變燕雀浮雲哀樂多  
風雨一編堪自得投竿釣艇任烟波

無求

無○求○不○去○緣○何○事○華○表○歸○來○有○化○書○城○郭○消○沉○白○日○速  
魚○羊○明○滅○黑○風○餘○三○年○淹○繫○匏○難○食○五○斗○捐○停○米○已○除  
多○少○元○龍○樓○上○客○江○干○爲○築○浣○花○居

九日壽高中堂封公

浩○蕩○歸○黃○閣○鴻○濛○啓○綠○圖○開○天○五○福○華○夢○日○兩○儀○俱○淵

海儲麟德崗陵引鳳雛家傳原合璧國瑞得玄珠以此  
酬長慶真如佩壽符玄芝迎錫杖彤管紀貽謨草木皆  
仙藥俚佗本大儒元方親御轡荀叔自絜壺星史頻占  
歲靈椿屢映弧年年籌比屋醉倩菊花扶

贈韓聖秋內翰

鳳池新待詔舊約夢蒹葭自隔中央水難同上客槎香  
爐○留○夜○直○綸○閣○鎖○春○紗○驢○背○看○山○客○勞○歌○白○日○斜

懷王偉樹東粵左藩

時陷賊後超遷

金華同醉地雲隔桂林深南鴈久無影北風不可尋  
階



圍知德厚出險見天心。宦老留荒徼駸駸歲月沉。

代贈浙中學憲

赤城霞起望高標。南國菁莪雨露饒。冰鏡夜明天目雪。  
文濤秋漲海門潮。青雲盡採歸蘭珮。紫氣遙瞻識斗杓。  
禹穴丹書應補袞。桂花仙露坐相邀。

觀奕

倦逐人求勝。閒看物隱情。不先甘後着。任讓欲何贏。  
變化局常駛。陰陽路易爭。爛柯憑袖手。老去罷縱橫。

壽佟少宰

東來紫氣傍崆峒。鍾鼎高懸稷契功。品藻倫空冰鑑外。  
平章人在玉衡中。絲綸靜轉昆池月。燕雀爭分閭苑風。  
南極壽星迴北斗。一時申甫祝華嵩。

乙未順天鄉試入簾執事作罷釣觀漁諸作

水寒秋盡月明孤。老厭垂竿罷釣鱸。無夢占熊憐涸水。  
何人問路出菰蘆。扶搖力短鯤難化。賜谷波翻海易枯。  
自捲絲綸看結網。桃花春暖任江湖。

投竿猶自旁靈槎。常咲浮鷗夢不賒。一尺雪鱸瓠子葉。  
十年秋月水蒨花。行吟澤畔人將老。濯足滄溟日又斜。

局內傍觀忘出處，滿場燈火亂雲霞。

收掌雜著

棘闈鳴柝夜多聲，獨坐空堂月不明。  
 文欲化龍當眼錯，筆能生鬼與人爭。  
 旁觀棊局心猶熱，靜聽蟲吟氣漸平。  
 三則何心仍獻賦，不勞造物擅權衡。  
 得失由來付塞翁，咲看桃李逐春風。  
 龍蛇爭向湫泥起，雷雨猶收角鬣功。  
 蟻穴驅車誇上郡，螢光撲火鬧飛蟲。  
 浮雲老盡名心客，今古消沉此夜中。  
 朱衣墨面本同文，隔紙糊名内外分。  
 脫殼蜣蟬渾在土

冲天鵬鴉欲搏雲，天桃和露原多種。宛馬嘶風別有群。

瓦破門開憑造化，六經糟粕正堪焚。

三代升聞世久訛，漢唐方正重賢科。  
 安知詞盛功名薄，更覺文深詐偽多。  
 燈火好將梯富貴，詩書無用挽江河。  
 常疑雲漢天孫錦，不為英雄借網羅。

移文不愧北山巒，周孔支離但守殘。  
 一字難炊高士甑，數行如拾進賢冠。  
 空傳神鬼來窺字，未見葫蘆已化丹。

司命不專青紫案，杏花多傍五雲看。

鉛槧朱黃滿架堆，楮光墨氣隱風雷。  
春蠶繭就絲成血



蠟燭流枯淚欲灰。星暗不逢東井聚。駿空誰向北風哀。  
科名自古才人餌。多少神鯨困暴腮。

昌平宰陳季紳述明代十二陵有感

一代松楸鎖漢阡。天荒何處問龍髯。最愁金椀人間出。  
誰護珠函隧下全。墓草久平碑臥土。牛車行盡樹無烟。  
行人共指神宗隴。化雨春風四十年。

陸鶴田郭季紳史庸菴過飲署中時中秋前二日  
所遇皆成聚。良霄亦作驩。欣同官醞醉。未覺冷氈寒。月  
影看人亂。風流任燭殘。諸君裘馬貴。星斗動波瀾。

李錦秋少府饋酒脯

三罌良不易。况復有分曹。簾外沾名醞。盤中得上牢。文  
場輕白髮。酒陣感霜螯。罷戰真無賴。吾甘號老饕。

中秋同諸公宴集貢院

良會真難偶。前期未可謀。客情當此夜。文事幾中秋。桂  
落浮雲散。天香馬鬣收。酒光正月影。鳴角動高樓。

青袍官署冷。良友近相過。樂地因人聚。閒情到客多。文  
章占斗壁。鼓吹動星河。莫厭盃添滿。衰顏未易酡。  
簷暑風燈短。庭筵酒政寬。名場爭鬪蟻。仙路倦乘鸞。拊

戰機心歇。杯空夜色闌。故山兒女意。此際月中看。  
南北隨流止。江湖有聚星。諸君多特達。此地本忘形。  
月夜聞征雁。燈光亂貯螢。人生温飽重。白首咲窮經。  
雲影無高下。安知月不愁。婕妤悲小扇。庾亮在南樓。  
桂老蟾當泣。霜寒杵莫投。素娥誰嫁汝。歲歲羨牽牛。

又 自甲子至辛卯入關八次

二十四年月。棘圍夢已孤。桂林誰捷足。天窟半穿窬。  
墨海雲生滅。玄霜藥有無。陰晴推不定。懷抱自冰壺。  
中秋陰晦三更後。月始明移席中庭。

相照未云晚。胡為沒朔陰。哉生憑海氣。夜半見天心。  
三五誰推測。盈虛自古今。蟾蜍蝕不盡。歲歲映華簪。

釣鰲吟呈陸鶴田

玄海枯竭黃輿奔。六鰲不駕崩崑崙。南極銅柱久斷折。  
羲和影暗扶桑昏。欲斫鰲背升天門。霹靂直走窮無垠。  
長竿久立嘆溟津。鯤騰鵬擊何紛紜。此物已虛負荷力。  
媧石煉補愁精魂。磻溪桐江不堪倫。天河下視隱朝暉。  
經綸舒卷隨乾坤。

次曹秋岳寄龔孝升五韵



出處常轆轤浮沉愧旅棲河深入自涉山遠客難携雨  
雪愁看劍干戈怯聽輦東方如可學執戟莫淒淒  
世路欣同病孤懷苦獨吟雲輕風易散松老雪難侵莫  
擊南山缶空移東海心時開歌楚調愁隔五湖深  
冰雪催遲暮棲遲已十春道高仍舍我身累竟徇人白  
眼時相待青山夢不真輸他遼海鶴雙翻出泥塵  
漁樵身未穩天地劫灰餘草閣仍遷次侯門罷掃除蠖  
蠓窺衆族鳥雀愛吾廬遙憶盧敖洞年年歲月虛  
葛洪丹竈近山約復秋來上谷沙連塞天風月到臺邊

鴻滿眼過園菊傍誰開護落悲生事蒙莊貴不材

賦得天馬老能行

硯礪連錢重金城已合圍長途知老將久戰惜殘暉  
淡拳毛短驍騰舊侶稀何當窮絕域八駿與同歸

故劍

故劍難雕飾光明久護身電仍迴北斗龍不躍延津欲  
贈無知己相憐有主人良霄風雨吼起舞向秋旻

敝硯

石友含真氣十年散彩虹黑雲龍戰野玄霧豹披風磨

礪終何益，堅貞許爾同。尚存雙眼碧，不染坐書空。

月夜同陳西樊馮清源陸鶴田登明遠樓

蒼茫不盡帝城烟，紫氣微明貫斗躔。高樹遠浮雙闕迥，迴闌下見萬星懸。征鴻夜度霜連塞，宿霧晴收月掛天。幾處銅龍催漏急，凌虛環珮近飛仙。

魏昭華侍郎以抗疏遷遼東

海塵吹盡後，龍復化為魚。塞馬翁多失，墻蝸角每虛。李陵書莫上，崔浩史終疎。流浪曾何恨，幼安有別廬。玄海無南北，同浮一芥中。誰憐精衛鳥，猶遇石尤風。皂

帽家無定，黃沙路不窮。當年蘇武句，情與古人同。

李錦秋王貞復再邀登明遠樓

月勝昨宵白，烟連上苑青。地高仍斗氣，天轉問參經。雷雨前賢化，山河舊業冥。扶搖誰六息，垂翼向南溟。

貢院孫京兆送白蠟

一燈簷下負秋風，寒影傷心淚不紅。長短更殘七草就，榮枯焰短幾人同。松烟不撤金蓮炬，琥珀遙分玉藥官。白雪樓中堪照月，龍光雙吐氣如虹。

再贈李錦秋少府

時以悞失左遷



經○旬○燈○火○影○幢○幢○高○枕○析○聲○動○曉○窓○酒○政○因○君○官○署○富○  
名○場○老○我○壯○心○降○悞○循○馬○足○籌○輸○一○妬○為○蛾○眉○士○少○雙○  
抱○臂○入○林○同○氣○骨○還○期○垂○釣○問○秋○江○

出闈別同事諸公 是歲場號多悞

闈○燈○樓○鼓○晝○封○門○風○雨○蕭○蕭○落○葉○昏○簾○外○分○曹○無○氣○色○  
堂○中○執○事○有○司○存○頻○驚○虎○豕○朱○衣○亂○不○分○魚○龍○青○海○渾○  
南○北○偶○如○鷗○聚○散○經○旬○醉○飽○亦○君○恩○

諸○君○自○合○上○青○雲○同○舍○難○逢○鄭○廣○文○燕○市○酒○徒○原○別○調○  
清○朝○仕○籍○未○能○群○代○人○作○嫁○衣○裳○拙○為○客○司○庖○水○陸○勤○

明日插花還共醉 旁觀席上笑劉蕢

收掌事竣計朱墨一萬七千餘總歸入簾有慚初

志

與○君○未○謀○面○手○目○已○經○旬○遇○巷○非○無○據○投○胎○定○有○因○緣○  
從○珠○劍○合○氣○借○墨○丹○伸○芝○蕙○原○生○菌○魚○龍○豈○在○鱗○香○光○  
分○骨○性○苗○莠○各○精○神○好○醜○誰○能○盼○榮○枯○詎○易○論○投○戈○或○  
不○戰○負○弩○竟○先○人○桃○杏○雖○多○暖○榛○苓○亦○有○春○紙○光○聞○泣○  
血○筆○力○迥○超○倫○說○夢○占○龜○幻○聞○聲○望○鵲○頻○禁○嚴○風○析○急○  
鈴○響○馬○排○勻○剪○燭○開○糊○縫○題○名○列○御○裊○文○場○如○夢○草○得○

失付鴻鈞

榜後落卷捆載付市折價傷之

蠹魚捆載爛成堆。簾外傳呼運卷來。三殿題名懸御榻。七篇殘冊付秦灰。好逢青眼粘書幌。幸遇黃流覆酒醅。聞道洛陽今紙貴。喜無名姓到塵埃。

凡落卷皆糊名不拆

文信井

在貢院東文場金麗二號

宋朝丞相不臣元。纍繫三年井尚存。欲向水邊羞照影。貪泉何事獨忘源。

賀高少宰雍師壽日家君得捷

年年桂影近乘鸞。絳節飄搖鶴背寒。玉斧再開新月窟。鳳毛同上古春官。收來帝女天襄錦。並作仙人承露盤。一氣鈞陶歸禮樂。駐顏何用大還丹。

送毘陵黃心甫徵詩北歸

文章鑒別非常事。湖海交遊少世情。此道何人存古意。於今無地着詩名。布袍落落雲隨客。囊草蕭蕭雪滿簾。珍重千秋惟自得。天涯風雨歲寒盟。

九日出都別諸公有感

舊遊隔歲故人稀。文酒蕭疎世漸違。陸海鴻飛多雨雪。



柳上詩  
卷一  
渾河水長遍京畿。高雲積雨歸山晚。落葉驚風出塞飛。  
行路難言江海濶。夕陽常負釣魚磯。

祝浙方伯張坦公先生兼懷西湖

重陽前五日。歲歲祝佳辰。往事懷京國。吾徒隔海津。虎  
林新授節。趺突尚攀輪。到處江河動。行來草木春。青雲  
開後輩。白雪接先民。橋憶蘇堤舊。詩懷白傅新。臨湖應  
得句。題石或思人。迢遞南天雁。悽遲北地塵。苦無舟楫  
渡。剩有桂蘭紉。安得林逋鶴。吳山訪化身。

出關後曹子顧太史招飲陸觴

感君清夜一開觴。爲破招提客夢涼。菊砌有花明夜露。  
桂林無實惜空香。米顛久別圖書舫。太史猶憐薜荔裳。  
別後兼葭應在念。美人原不隔西方。

留別劉太守

官微難次第。何路借天衡。叔向無私謁。林宗少宦情。到  
門煩倒屣。下榻感分羹。格外勞安置。知予近寡營。  
未敢言知命。誰甘久後時。逢年終伏鷄。用吏竟占著。叔  
夜狂如故。山濤性不移。守株將歲暮。自薦愧衰遲。  
容城生事盡。荒歲士民稀。無祿仍捐米。有官能採薇。芻



空憐馬瘦市遠苦兒饑  
杭稻終難獲柴桑未可歸  
抱關甘爽隱饑出傍誰門  
手板言偏拙情哀貌不溫  
醜錢詩累友留客酒償禪  
貧賤終難達羞沾國士恩

冬至易州謝許兵憲薦

秋山行欲盡關寒轉蕭森  
野渡冰封草孤村水立禽邊  
鴻無息羽老馬有歸心  
人事終何定棲遲歲暮侵  
野菊垂秋晚邊城落日黃  
鳥飛平楚没人度塞垣荒  
一顧占星斗長鳴困驕驕  
十年猶濩落回首厭風霜

同靳邑侯劉範修飲南城樓

野鳥啼殘堞荒烟水氣中  
村稀民地盡市散戍樓空  
憂歲謀官拙窮途得酒雄  
狂言無漸次幽憤發孤衷

定興道中九月望紫荆關上雪

野莽愁津渡荒城客路分  
關門秋見雪山戍晚蒸雲樹  
遠疑天盡沙昏苦日曛  
兵屯難問宿霜鴈自成群

金方藩陳藹公共集陳善百寓齋

偶來相聚亦無期沽酒敲門慰所知  
多事妄投江夏賦常貧偏累習家池  
關山霜雪催寒早鄉國尊鱸苦歲遲  
老去逢迎悲世難朔風吹雁影披離



楊丘言 卷一  
孤館高眠枕不支。酒闌常憶故山時。求羊每過因同調。  
蘇李相怜各有詩。夜半星河天慘澹。歲寒關塞路艱危。  
空庭露坐仍呼酒。話到漁樵未可期。

寓善百齋中賦贈二律

相對忘歸計。相談但旅愁。執鞭求短氣。掩面少良謀。  
風雨摧瓊珮。光芒惜蒯緱。十年頭白盡。處處仲宣樓。  
一榻容摩足。燈昏眼倍青。弟兄渾爾汝。尊酒本忘形。  
橘柚分霜雪。文章入性靈。何時同海墅。南北著魚經。  
善百家通

州子居  
琅琊

書懷

庾塵不上薜蘿衣。投謁應憎出處違。何地風塵收劍氣。  
誰人流水奏金徽。良宵說鬼刀頻嘯。白日求仙鼎已飛。  
莫向秋江賒月色。魚寒自捲釣竿歸。

雪中宿龍角村僧舍

月黑投烟磧。雪明沙岸長。危橋妨灌柳。曲堰隱橫塘。  
寂寞僧龕暗。蕭條塞路荒。迎門餘老衲。孤磬發燈光。

曲陽宰葛福餒雪中枉駕

仙令風塵外。高軒過長卿。漫勞先謀面。何地得知名。對

雪詩難就臨流酒易傾最宜歌古調老驥仰天鳴

冬日晚行過孫徵君故廬贈冢公君建

曉行霜氣重烟日澹村扉雪逕遙相引風林望欲微靜  
乘存古意泓硯湛朝暉坐久談詩理伊人隔釣磯  
徵君詩朴落孤往羨高騫每對元方靜常思郭泰賢家  
移隱者里人憶孝廉船何日猶龍返吾將問太玄

宿高里

高漸離家

筑聲久已沒此地念高陽故國心難死同仇志未忘鷄  
啼驚旅夢鴈唳怯邊霜夜宿沽村酒歌來慷慨長

曉行候督學程內院

西山連雪白宿霧失重巒河凍水湍合村饑野火寒長  
貧官慘淡徒步士摧殘吾道應如此空歌行路難

許兵憲招同張志公盧濟如陳藹公夜集出古鼎

名畫

夜火明鈴閣清樽照畫堂官尊門似水令肅月如霜鳴  
劍螭龍合披圖獬豸光髯軍頻入幕庾亮自登床好士  
真如渴搜奇興自長鼎彝分漢魏法物出琳琅碧玉斑  
文秀青山翰墨香酒浮紅琥珀詩捲紫縹囊物外存玄



賞寰中得秘藏○醉酣忘脫略○雅量恕顛狂○一顧金臺壯○  
長鳴感駟驪○

久客古廟戲答索酒諸客

蕭然破壁朔風加○童子關門自煮茶○三日休糧常斷火○  
五侯傳食久無家居○如病鶴眠山雪行○似饑鹿想飢沙○  
衆客何來求大嚼○盤中苜蓿不生花○  
十年辟穀煉丹砂○天付容城水一涯○煮石未能成絳雪○  
捫星徒欲摘匏瓜○枯腸濯月詩偏富○熱釜懸冰酒不賒○  
布褐擁衾深雪裏○杜陵無處不彭衙○

冬至

冬至題詩做少陵○蕭蕭易水客愁興○荆高事往傳歌筮○

燕代風衰薄友朋○此日江南梅似雪○誰憐薊北海成冰○  
應知殊域陰陽變○運轉璣衡未可憑○

關門日短黑風高○長至還嗟生事勞○羽獵平原鷹有角○  
摧頽窮谷馬無毛○刪緘冷絕耽名酒○蘭芷情深惜佩刀○  
回首故園梅信少○椽林竹嶺憶盧敖○

日影霜華朔氣回○春生陽雁北風開○已甘樗櫟求無用○  
自嘆匏瓜繫不材○高樹屯雲常捲雪○堅冰坼地隱藏雷○

只應任運隨義馭倒盡寒壚濁酒杯

易州王別駕招陪鄒司理風大不能赴作詩為謝  
四野陰風轉地昏候門屬吏暗消魂每來獨下南州榻  
不去仍開北海尊寒署有光生顧盼空厨無米感庖殮  
肯容破壁分燈照貧女流黃夜夜恩

同張恣公登易州城眺荆軻山

紫塞黃沙控朔方邊城風景近遐荒  
河流入樹雄關出亭障連雲古戍長  
國事漸衰思樂毅成謀難就惜田光  
黃金臺下蕭蕭水惆悵高樓對夕陽

陳善百過易州張恣公寓次韵

感感十年昧所之跨驢空賦灞橋詩  
太丘道廣人猶病麗統官輕性不宐  
短日過山留雪脊寒松掃影亂霜皮  
莫言逆旅愁沽酒自解鸚裘供瓦甌

南城共眺再柬恣公

淒淒風日塞垣陰獨爾閑行有靜心  
客老始知交味薄詩成方覺古情深  
沙明遠磧雙河轉日落平原一鳥沉  
欲判行藏聊偃仰城南獵騎帶歸禽

候陳藹公不至



強酒愁沾咲客貧。無端常與阮嵇隣。最憐快士心難定。  
未歷奇窮氣不馴。破榻已穿風四面。匡床兀坐月三人。  
挑燈何處堪長夜。未必高陽有葛巾。

招客

寒宵土銼火無光。客到招呼盡夜長。自惜空盤分鹵豆。  
何人行路給壺漿。持螯但覺庖厨富。剪燭時聞橘柚香。  
緜缺無魚求不得。床頭猶有禹餘糧。

邊愁

孤城哀角動邊愁。海客徒傷塞上游。韎韐衝風雙鶴鬣。

旃廬臥雪一羊裘。愁尋酒伴人難覓。老寄書傭債未休。  
鄉信不來頻極目。朔雲飛過雁門秋。

謝劉璽楚明府見招

廣文無端食指動。南隣臘釀新開甕。世亂誰推漂母恩。  
官貧未盡彭澤興。劉君新自江南歸。高陽舊里酒徒稀。  
座中一見相傾倒。茶香筍嫩鮭魚肥。宜密大碗白如玉。  
膾鯉烹羔珍品具。荒年从客苦藜藿。食何堪飽枵腹。  
感君爛熳皆天真。昨日棄官今日貧。窮途顧盼不易得。  
一飭由來感古人。

季冬二日上祝司農

瑤觴香泛歲星懸。斗柄將廻淑氣先。  
帝闕鼎鐘常捧日。元勳劍履已凌烟。  
堯天近賜千秋爵。禹貢遙歸萬里船。  
小子趨庭無路上。五雲南望隔華筵。

呈少宰梁玉立先生

曲臺新詔接台衡。環珮逍遙上玉京。  
水鏡全收人物表。泰階不隔地天平。  
雲霄一羽開新史。月旦千秋擷紫蘅。  
海內驂騑誰絕足。空勞剪拂但長鳴。

暮冬上劉太宰

尺五遙瞻隔斗衡。玉宵丹闕望昇平。  
應知暉晚消陽氣。詎有浮雲點太清。  
運轉薇垣冀有信。春回槐里雪無聲。  
最憐文酒追陪久。絕塞天涯歲已更。

答孫鍾元徵君時寓蘇門山

雲老西山不採薇。夕陽岐路客安歸。  
誰憐澤畔無漁父。安得滄浪有釣磯。  
魯野麟遊非絕筆。函關龍去似知機。  
十年避地身難隱。此日占星識少微。  
去國黃冠得自由。故園松樹漫科頭。  
柴桑菊老思彭澤。湘浦蘭芳隔楚洲。  
外史定留周日月。玄言誰續越春秋。



楊丘詩 卷一  
蘓門月落聞長嘯。姚許何人可並遊。

薛行塢夫子晉少宗伯

秩宗圭璧久蕭森。北闕彈冠歲月深。一統車書昭代法。百年禮樂老臣心。冰壺映署連中閣。玉樹盈庭近上林。別有釣陶開泰運。已知春色滿華簪。

樂陵張伯器談養生理

清尊塵尾夜談玄。爲問黃庭素問篇。南極一星通鼠谷。北溟六息養鵬天。丹爐伏火非關藥。兵法陰符半是仙。欲向叅同求秘契。松枯鶴老不知年。

謝張孟鐸刺史歲終送易酒十餅官炭千斤

召父棠陰易水隈。故人百里隔蒿萊。欲分熱釜添炊火。爲惜寒爐助舉盃。幕雪氣融詩力壯。餅泥香暖酒星回。鳴琴臥理忘消渴。久累臨邛愧不才。

恣公善百過飲嘗鄉中海錯

小聚成狂樂。欲喧偶來長夜欲消魂。盤中錯味移東海。囊裡餘糧嘆北門。拇戰風生疑鬼助。酒壚火盡怯鯨吞。最怜土薄交遊少。尚有荆高爾輩存。此夕狂歌醉不扶。一尊堪傍酒徒呼。相看客路懷猶壯。

莫嘆邊亭凍欲枯。老樹當庭霜氣滿。群山遶塞月明孤。  
年華近臘如歸壑。一任愁心付唾壺。

答丘子廩寄過橡谷山居原韵

青霞夢破咲蘧蘧。剩有名山鎖舊書。過屋梅花惟鳥語。  
空堂竹影少僧居。飛揚無力堪消憤。飄泊同心尙起予。  
薄宦何勞求辟穀。大官停俸少儲糈。

易州逢趙文成何調之顏駐影舊同訓。遼塾皆分

鐸上谷

蘇李遊踪雁影分。塞垣經帳惜離群。北來風氣難爲客。

西近邊庭尚校文。講肆再冷氈幕雪。酒壚同臥朔方雲。  
依違自覺晨星遠。落日徘徊對馬軍。

臘盡懷去年海上劉斗酌賞梅諸友

天涯臘盡憶東菑。雪滿潮平客散時。竹下梅花同泛酒。  
石邊杉葉坐題詩。風塵久負遊仙夢。歲月空辜野老期。  
日暮黃沙吹易水。幾行邊雁起相思。

同友人載酒登易州城樓

城上孤臺載酒尋。朔雲邊日影沉沉。晚來欲結西山雪。  
宿霧連天大漠陰。



蓮露釀成

新安水淀多蓮採露作麪雜以花鬚色味皆自以蓮露名

仙掌金莖有露盤野人折向碧波溥  
○太液香浮未易殘拍瓮雲沉琥珀動  
○停杯月映水晶寒  
○堪容病渴相如飲坐客偏勞倒着冠

椒丘詩卷

終



